

四庫全書

史部

# 欽定四庫全書

史部

平定朔漢方略卷三十四

詳校官編修<sub>臣</sub>曹振鏞

編修<sub>臣</sub>裴謙覆勘

總校官進士<sub>臣</sub>繆琪

校對官中書<sub>臣</sub>鮑之鍾

謄錄監生<sub>臣</sub>齊兆求

欽定四庫全書

聖祖仁皇帝親征平定朔漢方略卷三十四

十二月甲申

大將軍伯費揚古至自軍是日

上仍駐蹕薩爾虎拖會清晨費揚古將到

上遣皇長子皇三子皇八子往迎費揚古至

上出慢城費揚古趨進跪而請

安

上命入行宮與語良久續使議政諸臣前

諭曰朕謂噶爾丹乃熟於戰陣之狡寇滅之必需時  
日孰意一戰而立至敗亡前者費揚古奏言西路  
兵四月二十四日可至土喇二十七日可至巴顏  
烏闌故朕即統軍前進後杳無聲息在察罕布拉  
克待之數日果西路兵如期而至兩路夾攻則噶  
爾丹之兵一人亦不能脫矣其時諸臣尚欲待之  
於拖陵朕計西路兵今將到土喇朕軍不可不前

遂統軍疾進雖噶爾丹懾我軍威潰遁而西路以  
疲困之衆遇敵戰勝勢如破竹實為可嘉費揚古  
奏曰臣雖率西路之兵前往凡軍中機務皆謹  
遵

聖上指授手書密諭而行並未能別出意見有所効力  
况西路兵已糧匱馬乏不能前進及聞

皇上親至克魯倫衆官兵無不奮發齊言

皇上出自深宮尚且先至敵境我等其可緩乎故不待

催迫冒死前進不俟督責奮勇克敵若非

聖駕預臨無論滅賊即

臣

之身命亦不可保噶爾丹之

破敗皆

聖謨神武之所致柰

臣

庸劣以

皇上窮追困蹙之寇不能生擒而獻之

皇上則

臣

之罪也議政諸臣奏曰費揚古所奏亦是

皇上預料費揚古之兵必至若合符節忽防西路之兵

糧匱乏預令運往接濟真至聖至明也

上顧費揚古曰噶爾丹被我軍擊敗後散者散降者降  
是以朕親臨塞外相機而行今觀陸續降人及噶  
爾丹所遣格壘沽英之言噶爾丹窮蹙是真朕意  
悉加屠戮不如撫而活之故於爾未至之前朕即  
降旨招降費揚古奏曰

聖意迥出非常真天地好生之仁非

臣

等愚昧所能及

皇上出塞以來噶爾丹部落諾爾布寨桑等皆携其妻  
子接踵來歸噶爾丹知不能有其衆故遣格壘

沾英乞憐

臣

意宥罪之

詔既下噶爾丹必降矣

檄撫厄魯特車陵伊拉古克三庫圖克圖車陵

遣使來奏曰敬請

聖明萬安自古以來至達賴台使往來

朝請已五世矣末年欽差巴扎爾傳

諭龔格額爾克轄許之恩待欽遵斯

旨來投



聖上而將軍劫之拆我夫婦奪我財物幾戕我身命伏

乞

聖鑒因將軍奪我諸物且將討我是以逃歸蒙

皇上有俯恤之意伏乞

皇上即降恩綸

上諭曰車陵來歸朕我綠旗兵及蒙古兵不知擊而擄  
之後朕聞知痛責將軍諸臣矣今車陵來奏乞降  
彼恩綸著理藩院備文發去令車陵作速來降朕

將寵卹眷顧其離散之人盡皆查與完聚伊拉古

克三庫圖克圖遣使來奏曰臣昔在

太宗皇帝之時少効微勞得蒙

恩旨許以世世加恩臣是以留傳宗派後奉達賴喇

嘛法旨往歸

天朝微軀得蒙寵卹詎意惡徒彭素克格虛詞捏告大

臣不辨曲直斥逐臣身後蒙

皇上寵臣為喀爾喀厄魯特不和之事奉差出使臣罔

惜身命竭蹶

王事緣不獲分明遂有往皈西方之想厄魯特噶爾

丹博碩克圖汗奏於達賴喇嘛携臣而去臣欲

遣使奏聞而未能去歲意欲往見

欽差使臣侍衛克什圖而臣所居遼遠不得訴臣衷曲

今欲使喀爾喀厄魯特安寧臣已奏於達賴喇

嘛及博碩克圖汗矣

皇上如天之仁一唯

諭旨如何謹遵

旨而行

上諭曰伊拉古克三庫圖克圖自西域來朕待之殊加寵異想內不自安而去今可作速來歸彼乃喇嘛朕不介意當待之如初著理藩院檄諭之於是理

藩院備文開列奉

旨招撫原由付車陵伊拉古克三庫圖克圖使臣賁

回

乙酉

上駐蹕湖灘河朔之南以

御佩橐鞬弓矢及各種食物

賜大將軍伯費揚古遣還差尚書班第以銀

賜坐塘蒙古章京披甲

丙戌

休養官兵馬匹

上諭大學士阿蘭泰曰右衛大同官兵勿勞馬匹遠迎

各於城外近地接駕可行文諭之

已丑

駕次殺虎口蠲免大同府地丁錢糧

上諭戶部曰朕惟治天下之要惟以乂安民生為急顧欲安民生必除寇虐欲除寇虐必事師旅方今衆  
宇昇平人咸樂業獨厄魯特噶爾丹狂逞邊塞荼  
毒生靈朕思為邊境人民永絕後患故特發大軍  
分道進剿朕躬不憚勤勞今春親統中路大兵深

入無水草之地直抵拖諾比噶爾丹聞朕親臨盡  
棄輜重倉皇宵遁適與西路大兵相遇大敗潰散  
俘獲其人口其寨桑等來歸者甚衆而噶爾丹收  
遺寇千餘人仍竄伏於枯倫白兒齊爾等處地方  
朕於冬月復統軍出邊相機勦撫駕抵鄂爾多斯  
於是厄魯特人民來歸者絡繹相屬噶爾丹力窮  
勢蹙亦遣格壘沾英具奏乞降隨經頒示勅諭許  
其歸順惟是噶爾丹乃狡詐叵測之人其果否來

降猶未可定仍當厲兵秣馬待來歲出師撲勦務  
絕根株比年以來軍前需用馬匹在大同府屬牧  
養者甚多措辦草料等項雖俱支用正項錢糧而  
供億浩繁殊勞民力但必此賊盡滅然後邊外蒙  
古得以安寧而在內生民亦獲休息師旅之興大  
非得已該郡官民尚各勉力急公勿以煩苦為慮  
朕茲從邊外返蹕雲中深軫民力之艱用沛特恩  
以示寬恤康熙三十六年大同府屬州縣衛所應



征地丁銀米著全與蠲免俟噶爾丹殄滅之後朕  
自誕布德音渙敷庥澤爾部即行文該撫通行曉  
諭俾咸悉朕惠愛黎元至意

庚寅

使前鋒統領碩鼐屯兵右衛以待調遣內大臣馬  
思喀等自言京城起行時屬在出征之列今

臣

等所率之兵既留大同

臣

等亦請與同留此際

倘有調遣可以効力

上曰此際並無事朕與將軍費揚古商噶爾丹若於今  
冬來降將軍費揚古處現有察哈爾兵五百人黑  
龍江兵一百人再將右衛烏鎗手二百人副將黃  
元烏鎗手一百人交右衛護軍統領量給馬上礮  
數門及大同養馬之鎗手前鋒四百共七百人令  
前鋒統領碩鼐率之至右衛以備倉卒待大將軍  
費揚古調遣碩鼐率之而進有此七百兵加大將  
軍費揚古處所有六百兵再調蒙古部落兵千許

共兵二千餘用之不盡矣如此則大同所有烏鎗  
護軍一千礮手二百四十前鋒四百黑龍江兵五  
百現存護軍二百概不調動駐扎喂馬俟改歲有  
征行之事再用此兵爾等其集議以聞議曰

聖諭已極周詳俱應欽遵

上旨而行應令前鋒統領碩鼐率烏鎗手前鋒四百來  
至右衛駐扎此所率前鋒四百及右衛烏鎗手  
二百之該管將領扣兵數派出其副將黃元一

百名鳥鎗手著彼親率前去大同喂馬之兵所  
留新滿洲護軍二百碩鼐率來前鋒四百自十  
二月正月至二月給之行糧右衛草料少侍郎  
阿爾拜右衛所喂馬駝著趕至大同喂養

上從之

辛卯

以護軍統領宗室費揚固為右衛將軍

上諭大學士阿蘭泰尚書馬齊曰右衛護軍統領宗室

費揚固人材偉健又多勞績大將軍費揚古現有  
邊外之事右衛地方關係重大著以護軍統領宗  
室費揚固為右衛將軍其護軍統領員缺該部照  
例開列具奏選擇補授都統伊勒慎年邁庸劣著  
離任其缺以漢軍都統戈布為滿洲都統戈布員  
缺以副都統雷繼尊為都統雷繼尊員缺以右衛  
副都統馮國相調補宗室楊福材貌偉健人品優  
長以馮國相員缺授為右衛副都統榆林總兵官

柯彩居官不善失士卒心著作速行文令柯彩乘  
驛星馳來赴行在張家口副將施世騷人材偉健  
支派亦好著陞施世騷為榆林總兵官令即傳旨  
著施世騷自此地起程赴總兵官任又

諭曰山西巡撫員缺以倭倫補授朕已票本發行著  
傳諭倭倫前任噶爾圖溫保居官俱不善著倭倫  
勿得倣伊等行事今即赴任

癸巳

邊內安塘至寧夏

上諭尚書馬齊曰今邊外蒙古馬瘦之時恐誤急務爾  
可前往沿邊安塘至寧夏併閱兵行之路來奏

甲午

給還大小官員馬匹

上諭行兵部曰先因官兵無馬出兵右衛者以隨駕官  
員馬匹給之乘坐俟到右衛後解大同府喂養今  
觀所喂馬匹俱已復原著查明各還原主

乙未

發部議叙西路官兵功行兵部奏曰大將軍伯費  
揚古等以昭莫多地方大敗噶爾丹事奏

聞

上命將在事有功人員從優議叙欽遵在案今以此次

擊賊八旗官兵及陣亡官咨送

臣

部應著大將

軍議政大臣本隊大臣夸闌大出結咨送如以  
不應論功人等功牌咨送將出結大臣夸闌大



及冒功人員一併嚴處

命下之日施行至西安右衛當論功官兵功牌各該

將軍查取亦出結照功牌另造冊用印差官送

臣部其外藩官兵行文理藩院議叙

上從之

賜哈密回子額貝都拉達爾漢白克蟒袍等物先

是額貝都拉達爾漢白克奏曰臣等白帽之族

自古以來皆係

皇上之人向來進貢受

賞詎意

天使至吾地被慙都羅卜臧噶爾丹博碩克圖汗之兵

所害

臣

等不能保護使臣使脫於厄魯特之手

僅於其軍中查得所餘人衆并章京一人助以

牲口衣糧令還

天朝即具疏附奏恐有與

臣

不睦之人謂

臣

亦同劫掠

或至

上聞臣安敢行此不法之事若厄魯特則劫掠之後即可四散而去臣居有城郭豈為此悖謬之事總之

皇上即天也逆天舉動之人其身必受殃伏祈

睿鑒奏至

上命侍衛阿南達遣人偕來使傳諭白帽等曰爾等可照常安居噶爾丹已為我軍擊敗遁逃若有一應聲息俱著來報力似可能當即擒解必加恩賞至

是額貝都拉達爾漢白克聞

命不勝懼忭奏曰若噶爾丹來臣等相機竭力以擒

之若聞聲息陸續奏聞

上以額貝都拉達爾漢白克誠心內附

特賜蟒袍貂帽金帶等物併厚賚來使納林白克遣

歸

丁酉

諸王請

安發馬迎

駕

上騎而行

顧大學士張玉書等曰朕所乘馬乃係哈薩克國之馬噶爾丹得之為我軍所敗我軍得之朕乘而試之其汗如血古所稱大宛汗血馬想即此也張玉書等奏曰史稱大宛馬為天馬其汗赤行可追風以為詳瑞入於樂歌臣等未見常謂之虛

言今

聖上乘之觀其汗相符苟非德威遠播何易得此非常  
之馬乎繼之在京諸王貝勒貝子公俱遣護衛  
賁馬迎

駕請

安

諭曰今正值馬價騰貴之時爾等何必疲勞馬畜來  
遠迎乎朕所御馬愛惜乘用並不羸瘦此番得馬

畜甚多進京之後尚將賜及汝主爾等即將送來馬匹敬慎帶回

戊戌

定海總兵官藍理請調要地選兵乘機効力堵剿

不許藍理奏曰

皇上聖德同天萬邦臣服下至窮壤罔不重譯來朝者考之史冊聲教之隆疆隅之廣誠未有如今日

者也獨厄魯特噶爾丹負

高厚之恩觀其猖狂肆橫不過窮壤無知小寇罔識

天朝之威敢奮螳臂之力自取滅亡而已

臣

愚以為當

討而不可縱

皇上睿謀乾斷直擣賊巢特為邊疆久安長治之計雖

古之英主亦萬不能比

皇上於萬一也

臣蒙

恩極深並未嘗有以報國近者



聖躬親統六師不避勞苦遠征不庭臣職在海隅不獲

荷戈前驅坐視

君父宵衣旰食而罔念誠人臣之最不忠者也是以臣

寢食靡寧日夜憂慮但欲盡犬馬之力捐軀報

効不計狂妄上干

天聽伏乞

皇上俯賜准行以竭臣愚忠臣前蒙

特恩曾任宣府總兵畧曉西北情形請

皇上調

臣

山陝沿邊駐扎歸化城等處俾得隨軍勦禦

厄魯特噶爾丹少効微勞以盡

臣職

臣尤有管

見敢為

皇上陳之勦禦厄魯特當用藤牌火器居前馬兵繼之  
此誠破敵之要着如欲用藤牌當用福建平時  
操練便捷輕巧活潑之步兵至浙兵廣東潮州  
鎮標兵內能用火器者多況南方之兵俱善步  
行

臣

在浙江時從軍進勦逆賊灼知浙兵之可

用至前者恢復彭湖之後臣管福建水陸兵親

加訓練者有之親率出戰者亦有之觀其中精

銳之兵多伏乞

皇上調福建水陸提標步戰兵三千使用藤牌調廣東

潮州鎮標步戰兵一千使用火器交臣帶至沿

邊要地操練不但臣可臂指使之或出邊征勦

或坐鎮要害請

皇上指揮調遣得仗

天威必能畧建寸功蹈湯赴火而噶爾丹可指日勦滅  
矣又思八旗

禁軍居重馭輕以保護

京師者也如屢調出征必致勞頓至各省提鎮標  
營綠旗官兵特為征勦盜賊固守地方而設者  
也況浙江福建廣東前因海寇未除故多設官  
兵以備征勦今海寇既平歷年已久

天威遠播海上無事當調南方之兵以征西北方之小

醜如此一轉移調度深合用兵之道既不增兵亦不費餉大有利於地方者也事平之日上項之兵仍可發回本汛額設之處亦不煩更改臣報

主心切固計干冒謹具本密奏

上曰噶爾丹敗遁以來窮困已極下人紛紛離散來降者絡繹不絕今噶爾丹差人納款乞降朕躬現自相機調度雖不速降亦不久就擒不必調遠省官

兵所奏已悉該部知之

都統摩特鄂欽規避不出征革職治罪理藩院  
奏曰柰曼多羅達爾漢郡王班第協理旗務公  
格勒兒等呈稱

欽差都統杜思噶爾賚文傳

諭云王貝勒台吉奏請隨

駕効力者率其護衛附丁追赴

駕前其兵往備於烏爾揮河某等遵此起行隨

駕之日謂我旗下都統摩特鄂欽云但俟別旗兵起行  
則令本旗兵每隊派出披甲三名遣往軍前有  
無馬者捐助馬五十匹給而遣之今本旗兵竟  
不前去問之摩特鄂欽雖供我軍無糧告之台  
吉班第而不遣行但班第供云我未嘗止彼不  
必出兵副都統阿爾納多爾濟佐領阿哈帶等  
可証問之伊等俱云並無告之班第而言不必  
出兵之事揆此則都統摩特鄂欽明係身自規

避不率兵出征巧為之辨查康熙十五年定例  
內將領規避不出征革職罰三九牲畜發該部  
落披甲應照此例將摩特鄂欽革去都統罰三  
九牲畜發該部落披甲得

旨著將摩特鄂欽革去都統解至京城發當苦差

寬宥都統達什罪理藩院奏曰喀爾喀多羅貝勒羅  
卜臧等揭送都統達什原派本旗出兵而以無  
糧無馬竟不出兵達什坐規避不出征情罪擬



革去都統罰三九牲畜發該貝勒披甲

上諭兵丁果有無糧馬著查明遵即行文貝勒羅卜臧  
查覆云本旗人員甚貧而去年又復田穀無收  
坐馬口糧全無是實出具印結前來應將都統  
達什不出兵之處免議

上從之

己亥

給青海台吉額爾德尼台吉封號額爾德尼遣使

入貢具疏奏曰曩者

皇上以臣祖車陳台吉率衆効力曾加

恩賞頒賜誥勅即世之後臣父墨爾根台吉亦蒙

聖眷得給

恩綸臣於臣父存日未獲上陳今臣與

天朝封疆大吏通好往來不異曩時伏乞推臣祖父之

恩

給賜誥勅至黃草灘地方臣欲捕獵而守邊官吏奉

旨禁阻更祈

頒諭俾得捕獵

上諭曰額爾德尼台吉納木扎爾懇請推其祖父之恩  
給之誥勅著將所給伊父土謝圖帶青之名寫勅  
與他至請於口外黃草灘行獵前任尚書科爾謀  
代曾奏請黃草灘地方雖係內地而達賴喇嘛請  
准青海諸台吉游牧其時即遣原任尚書科爾謀  
代等為默爾根台吉等畫界受地不受而去今既

已為內地不准給

以遊擊王文雄為張家口副將

上諭大學士阿蘭泰曰著將張家口協標營遊擊王文雄以原銜管張家口副將事今即宣旨

庚子

右衛備兵撥給馬匹草料議政諸臣奏曰將軍宗室費揚固等咨稱右衛烏鎗手二百名現在預備前奉部文開

上諭曰右衛兵丁之馬著從容置辦倘有調用將京城  
每佐領四匹之馬或上駟院馬太僕寺馬撥給欽  
遵在案右衛兵丁所有馬八百六十三匹現在  
大同喂養此所備烏鎗手二百或另撥馬與乘  
或即取大同所喂右衛之馬撥給又右衛之馬  
俱倉升料三升草二束平半無給本色者目下  
豆攪稗穀草僅給七斤如此草料馬馬能肥請  
所備烏鎗手二百名坐馬及草料照前鋒統領

碩鼐所帶前鋒四百之例支給查右衛鳥鎗手  
二百名交前鋒統領碩鼐現在預備聽大將軍  
調遣而行應撥大同所喂右衛兵丁之馬給預  
備二百之鳥鎗手每人三匹趕至右衛照碩鼐  
帶往四百前鋒喂馬之例支取草料著右衛將  
軍費揚固監視小心喂養

上從之

壬寅未時

上山德勝門進神武門入

宮詣

皇太后宮中請安

癸卯

大同營馬缺額著照數賠補併察議喂馬怠玩  
官員兵部奏曰大同總兵官康調元疏稱該營  
挑給兵丁馱米之馬倒斃四百八十二匹坐馬  
及陣傷馬匹共倒斃一千五匹乞照數補足等

語查此項缺額馬匹原當取陝西茶馬補給但查近者寧夏總兵官王化行以河西營馬隨征倒斃缺額者多其營額馬缺一千匹具奏臣部與戶部會議此項缺額之馬速將換茶之馬照數補給如茶馬不足則速動支錢糧採買補給其河西各營缺額馬匹亦作速補給奏准在案今若仍取茶馬則茶馬不敷亦未可定且往取茶馬往返路遠必致營馬久空應檄晉撫僅此



一次動支朋銀陸續採買補足馬額除陣前傷斃七十二匹不議外其騎坐倒斃馱米倒斃者共一千四百八十七匹此皆該管官員怠玩禁令不嚴飼飲不謹以致倒斃甚多應行文該撫查明怠玩官員題叅後將該鎮一併查議上從之

乙巳

外藩諸王請隨征

止之科爾沁和碩達爾漢親王額駙班第旗下協理

旗務二等台吉畢立滾達賴等奏曰臣等願得

居此倘

聖駕更有征討之事隨往効力又科爾沁和碩達爾漢

親王額駙班第旗下協理旗務多羅郡王畢立

克圖等奏曰臣等願得各自歸家備辦馬畜等

物倘

聖駕更有征討之事臣等從口外往會

上曰著各歸本地不必預備

丁未

遣新滿洲祁思庫等往大同養馬議政諸臣奏曰大將軍伯費揚古疏稱蒙

上以新滿洲祁思庫等十八人交臣令彼効勞若留於此地難以照顧而有悞於伊等明年之行除

上賜馬二十匹外

臣

之羸馬俱發往歸化城喂養令祁

思庫等或發往大同與黑龍江兵一同喂馬待

來年之行或令遣歸伏乞

皇上指示等語查祁思庫等十八人皆奉

旨任將軍軍前効力聽其指揮者也應遣祁思庫等  
暫往大同與黑龍江兵一同喂馬俟來年出行  
之時仍遣赴大將軍軍前効勞

上從之

發總管關保等兵之馬往大同喂養議政諸臣奏  
曰大將軍伯費揚古疏稱總管關保官兵已預

備明春出征但伊等之兵自本年四月出行至十二月在此馬匹羸瘦若不預喂則不可用請將關保等留臣軍中遣伊馬匹酌發官兵前往大同整治器械支草料以喂之查軍需馬匹關係重大應准將伊等馬匹酌發官兵至大同整治器械喂養馬匹

上從之

使大將軍伯費揚古嚴巡哨汛費揚古奏言近奉

上諭令侍郎滿丕郎中桑格駐扎喀爾喀和碩親王善

巴喀倫探聽聲息

臣

思今時寒冷駐扎喀爾喀喀

倫者未必不避寒寬深輿之地而居且噶爾丹

使人歸去經過地方所設哨汛彼俱窺見不得

不將彼所窺見哨汛改使遠設嚴加巡察且內

大臣策旺諾爾布一等侍衛鄂齊爾杜拉兒現

在

臣

軍前令伊等往赴喀爾喀和碩親王善巴

多羅郡王滾布等處駐扎不時巡查哨汛則坐

哨之人不致懈惰避居深輿而皆謹嚴矣是以  
令內大臣策旺諾爾布往多羅郡王滾布處一  
等侍衛鄂齊爾杜拉兒往和碩親王善巴處不  
時巡查倘噶爾丹來降一面遷喀爾喀於喀倫  
內集兵護後一面報臣十二月十八日已遣行  
矣

報聞

戊申

員外舍稜私歸發部議罪理藩院奏曰大將軍  
伯費揚古報言公衛徵車木楚克納木扎兒詳  
稱坐哨員外舍稜言居烏爾揮已四閱月矣並  
無聲息汝等當各歸我則回奏其情我等言未  
曾奉

旨我等不敢舍稜已於十二月十四日起程而去我  
等當作何措置伏候裁示是以檄公衛徵車木  
楚克納木扎兒舍稜既去汝等亦各自歸家可



也為此報知舍稜查獲厄魯特理應差人解送而親身解來殊為不合應交該部察議

上以發所司

庚戌

議叙厄魯特降人

上諭內大臣公福善等曰今當封印之後爾等會同部院諸臣將厄魯特降人為首者並所携人口幾何查明議叙歲內具題會議得丹巴哈什哈察罕西

達里哈什哈為首率領吳海丹等一百六十三口來降韓都台吉為首率領塔爾巴等二百四十三口來降米寨桑為首率領八十四口來降土謝圖諾爾布為首率領八十口來降理應議叙但俱奉

特旨授以官階應無庸議土克齊寨桑為首率領五百口來降應授以二品官職古英寨桑率領一百二十口降於大將軍費揚古軍前應授以三

品官職今已物故應授其子羅卜臧四品官職  
台吉色稜扎卜為首率領七十二口來降應授  
色稜扎卜四品官職綽克托巴圖爾唐古特寨  
桑巴當寨桑額西德克額爾克哈什哈莽鼐哈  
什哈都喇圖巴圖爾默爾根畢立克等稱我等  
七人隨車里克歸去復公同商議同心來降並  
無為首之人綽克托巴圖爾等既稱同心共議  
率領一百六十八口來降應將伊等七人俱授

以六品官職楚魯克巴圖爾稱我隨噶爾丹至  
烏闌布通與大兵交戰後即出而欲降我主教  
爾肯執我而禁之又克魯倫地方噶爾丹之  
寨桑車陵布木伊巴博羅特寨桑和碩齊阿齊  
圖色稜共五寨桑奪前鋒之馬而歸去我遇中  
書阿必達賚

皇上勅書併賜噶爾丹什物引至車陵布木諸寨桑所  
彼以我引

天使至彼褫奪我馬匹財物罰我步行上項情事散秩  
大臣丹巴哈什哈沙克朱諾爾布中書阿必達  
可証詢之丹巴哈什哈阿必達等皆云果然且  
為首率領一百八口來降應授以三品官職晉  
巴雖於未戰之前為喀爾喀部長一等台吉阿  
里雅旗下阿爾薩闌衛寨桑所擒然奏請  
皇上情願効力賞

勅往諭噶爾丹招巴巴奇寨桑來降應授四品官職

巴巴奇寨桑為首率領六十口來降遇伊拉古  
克三庫圖克圖皆被擄去巴巴奇六十口雖被  
擄去仍復來降應授以五品官職噶爾丹管理  
賽賴滾之布爾奇達爾漢寨桑色稜寨桑丹巴  
寨桑吳勒木濟哈什哈自尚書圖納一到即為  
首率領一百七十九口來降應授以三品官職  
色稜寨桑丹巴寨桑吳勒木濟哈什哈應授以  
四品官職馬穆古英寨桑六口馬爾雅寨桑六

口喀爾喀之哈爾巴達爾漢寨桑丹巴額爾德  
尼寨桑轄杜噶爾二十口畢達喇二十九口多  
濟二十四口阿哈魯克默爾根二十口霍代丹  
巴哈什哈之西爾哈達什等十九口朱兒扎哈  
十九口巴卜里十五口哈什哈十五口鄂齊兒  
十二口伊爾都齊十口巴塔噶克十一口達特  
拔十一口阿木呼郎九口庫濟思希九口吳默  
赫默爾根寨桑八口博羅特七口折西六口台

吉鄂羅斯莫倫吳山岱庫喇卜畢齊克各帶五  
口而來布達席拉卜等各帶四口來降額林辰  
綽托賴孟克唐噶禮克垂扎卜曼濟思哈鄂羅  
斯等俱帶三口而來班秦珠爾巴哈兒納秦巴  
牙爾圖等各帶二口而來霍岱庫達席力察罕  
鄂木布薩木哈雅柰孟克杜爾伯特肯折多爾  
濟烏克爾多羅默丹津巴爾丹納馬爾沙等各  
以隻身而來查沙克朱木馬穆古英寨桑等為



首而來之人三十九口以下至二口以上來降  
霍岱等十三人皆隻身而來伊等率來人少單  
身來降不及議叙之例應無庸議

上曰以土克齊寨桑米寨桑韓都台吉為一等待衛位  
在一等待衛半班之上蒙古侍衛之下以馬穆古  
英寨桑哈爾巴達爾漢寨桑丹巴額爾德尼寨桑  
為四品官拔為二等待衛晉巴巴巴奇阿穆呼郎  
鄂羅思拔為三等待衛博貝台吉吳山岱杜噶爾

額爾克丹巴哈什哈之弟索諾木諾爾布之弟車陵俱拔在藍翎以庫濟思希達爾漢哈什哈霍岱為七品官海呼兒該達瓦人材甚優且有勞績亦授為七品官餘如議行

臣謹按聖人之所以動物者誠而已矣誠之所感豚魚可格而況心知血氣之倫乎厄魯特格心向化歸我

聖朝在人情或不無疑貳我

皇上列之環衛使值周廬材者既備我驅策其他亦皆  
量能而使蓋不特推心置腹為招携懷遠之

道而

聖天子如天之度真視天下為一家朝為降虜暮為王  
臣至誠動物宜其接踵來歸有以平數十年  
未平之狡寇也

辛亥

蠲免甘肅所屬及榆林等沿邊州縣衛所地丁錢

糧

上諭戶部曰朕惟治安天下唯期民生得所而民生之  
得所必以敷恩寬賦為要朕於一切事務稍有動  
用民力之處即厯懷殷切刻不能忘比年以來因  
厄魯特噶爾丹猖狂逆命遣發大兵分道進剿軍  
興供億不得已而煩民力甘肅所屬各州縣衛所  
及榆林等處沿邊各州縣衛所適當師行要道喂  
養軍前需用馬匹並大兵往來經過各項措辦雖

俱支給正項錢糧而供億煩多閭閻勞苦朕心深  
用軫念著將康熙三十六年甘肅巡撫所屬州縣  
衛所陝西巡撫所屬榆林等沿邊州縣衛所地丁  
銀米盡行蠲免行文各該撫徧加曉諭務俾小民  
均沾實惠稱朕體恤黎元至意甘肅所屬銀米既  
經全免需用錢糧著於隣近省分作速撥給爾部  
遵行又黑龍江雞林江地方頻歲米穀不登著行  
文盛京將軍修整船隻照先噶爾圖運法將盛京

食糧用本地脚力運五十石至摩爾烘阿敦地方  
收貯今年天津海運到盛京之米已散給科爾沁  
貧人矣來年宜仍自天津運米至盛京運此米者  
不必用福建浙江船即用天津所有船隻運一次  
交與侍郎陶岱可也

副都統阿南達開列邊外路程進呈阿南達奏  
曰理藩院咨稱奉

旨著行文阿南達將自寧夏至翁金之路自翁金至

薩克薩特呼里克及噶爾丹現在所居通金地方  
路程及嘉峪關至哈密路程哈密至薩克薩特呼  
里克路程開明奏覽欽此查得自寧夏至翁金河  
二千一百餘里自翁金至薩克薩特呼里克一  
千餘里自寧夏至翁金之路喀爾喀部長一等  
台吉汪舒克丹津額爾德尼等旗下鄉導伊白  
格兒畢兒超海歐勒等知之薩克薩特呼里克  
在什爾哈之南喀喇阿濟爾罕山陽自翁金而

什爾哈而通金而薩克薩特呼里克之路臣阿  
南達使人往噶爾丹之時克鄉導前去者乃伊  
拉古克三庫圖克圖之弟子滾布吳巴什彼則  
知之又自嘉峪關至哈密二十日內可到巴爾  
呼兒在哈密之東方至此與至哈密同自巴爾  
呼兒至薩克薩特呼里克第九日可到為此具  
奏

報聞





聖祖仁皇帝親征平定朔漠方略卷三十四

欽定四庫全書

聖祖仁皇帝親征平定朔漠方略卷三十五

康熙三十六年正月甲寅

大將軍費揚古奏報于成龍等運米至喀喇穆  
冷先是于成龍等請曰大將軍領兵駐扎喀喇  
穆冷臣等情願運湖灘河朔倉糧三千五百石  
至喀喇穆冷地方

上但准運一千五百石交將軍運米駱駝亦交將軍在

水草佳處放牧至是費揚古奏曰于成龍等將湖  
灘河朔之米自十一月十二日始陸續起運親  
身往來監督共運米一千五百石至喀喇穆冷  
運米駱駝則于成龍三十五頭侍郎李鈞通政  
司通政喀拜等各三十頭侍郎王國昌喻成龍  
正卿辛保侍讀學士范承烈等各二十五頭共  
一千零五頭計部落佐領之多寡分給於水草  
佳處小心牧放為此奏

聞

上報聞

乙卯

使兩路出兵預備軍需

上諭領侍衛內大臣尚書班第等曰今觀噶爾丹勢甚窮蹙天與不取坐失事機遣格壘沽英杜拉兒寨桑歸去期以八十日可得其聲息前所遣吳爾占扎卜之母齊巴哈齊信音將至若不撥兵預備恐

致有悞事機今次出兵亦分為兩路一路兵三千  
名此兩路兵不必預定期約令相機而行綠旗兵  
多無用派兵從少馬則從多綠旗兵酌給馬匹方  
可與滿兵同行此番出征米則照常隨行外沿邊  
有牛羊可買須動支正項錢糧每路備買牛羊各  
二萬發去於軍資大有裨益至馱米以馬馱為要  
亦當多買備用買此駝馬騾驢牛羊須遣能員往  
甘州寧夏兩處採買爾等集議以聞會議以為今

噶爾丹窮蹙已極天與之機良不可失當謹遵  
聖諭而行除右衛前鋒四百烏鎗手二百副將黃元綠  
旗兵一百已遵

諭給大將軍伯費揚古預備應不議外大同所有前  
鋒四百烏鎗護軍一千火器營兵二百四十黑  
龍江兵五百並

皇上留駐大同新滿洲護軍二百駐扎寧夏副都統阿  
蘭泰兵八百共合為三千令一路進征將軍博

濟率西安兵二千現駐肅州令將軍孫思克於  
彼屬下總兵官以下能員內選兵一千每人酌  
給馬匹共為三千令一路進征應給綠旗兵之  
馬即於綠旗兵之馬內選肥者給與此兩路兵  
不必預定期約令相機而行此軍所需駝馬騾  
驢牛羊在甘州寧夏採買每處選賢能官五人  
與督撫地方官會同動支正項錢糧照時價採  
買即交地方官動支正項錢糧喂肥至派賢能



官聽該部引

見隨軍之餉俟

命下之日另行議奏得

旨軍中所需駝馬牛羊在寧夏採買者交西安副都  
統阿蘭泰採買在肅州採買者交駐扎宣化侍郎  
席米圖往肅州採買俱係動支正項錢糧採買著  
照時值交易勿得短少選部院賢能官遣至阿蘭  
泰席米圖處與督撫地方官會同監買仍令地方

官以所有駝馬驢騾捐助大學士等可會同部院大臣簡選人材可用家計殷實官員引見毋得徇情至大將軍伯費揚古目下有事仍率前鋒統領碩鼐所備之兵而行如目下無事或在大同養馬或出兵則率前鋒與是軍同行黑龍江兵器械全無正在控告難以遠行應令往右衛駐備爾等再與大將軍費揚古會同定議具奏仍照前議請遵旨行

上從之

臣謹按王者克詰戎兵奉彰天討以時進止  
事既貴乎知幾使軍實不先預備一旦舉薄  
伐之師申誣告之命無以作飽騰之氣而收  
臂指之効也我

皇上神謨廣運事炳幾先知噶爾丹徼外游魂窮困已  
極爰

命師分兩路箕張翼舒戎馬車徒素具固已無事簡

閱矣而又隆將帥以委任之權使之相機而行不必豫定期約然諸將凜遵節制罔敢踰尺寸而奏膚功良由制勝於

廟堂之中不先時不後時察情偽而知虛實也若乃師行糧隨餽餉弗絕更

勅沿邊畜牧之地廣置駝馬驢騾牛羊以供牽輓之需以資饗賚之用所以足軍需而壯士氣又何

慮慮之周詳而

恩施之遐訖也掃除克逆不於此豫決其機哉

大將軍費揚古報差侍讀學士伊道自湖灘河  
朔至郭多里巴兒哈孫閱路分站理藩院奏曰  
大將軍費揚古咨言差侍讀學士伊道鄉導額  
素克阿南達納木喀爾自湖灘河朔至郭多里  
巴兒哈孫詳視路途粗分站次限五十日內回  
於康熙三十五年十二月二十二日遣行

上曰伊道非能事之人宜令他人去為是行文諭將軍知之

將軍博濟報遣副都統席爾哈達馬雲霄出兵  
博濟奏曰兵部咨開副都統席爾哈達等奏請  
隨將軍博濟軍前効力

上命於席爾哈達費揚固瓦爾達祖良璧馬雲霄內著  
該將軍酌量帶往欽此派副都統席爾哈達馬雲  
霄出兵為此奏

聞

上報聞

戊午

核計軍中馱載需用駝馬

上諭大學士阿蘭泰等曰一路三千兵從盛甲器械鑼  
鍋帳房等物重幾觔百口糧重幾觔馱此當用  
牲口幾何及二萬牛羊可食幾日著與部院大臣  
會同核議具奏此次兵丁行李須比去年春季兵

丁行李從輕估算會議曰查康熙三十五年進討  
噶爾丹兵丁以僕從一人算每人給馬四匹四  
人為一朋一朋合帳房二間鑼鍋二口搭連四  
個鑄斧鋤鋤各一柄一朋八口拴帶八十日口  
糧四石二斗以十五觔算重六百三十九觔有  
餘盛甲四副重一百二十觔合帳房二間連樁  
二梁柱重五十觔箭二百二十枝重二十二觔  
大小鍋二口重十五觔鑄斧鋤鋤重九觔搭連



四個橈斗皮稍馬等雜物重一百二十觔連米  
共重九百七十五觔零一朋馬十六匹本身與  
僕從騎坐八匹所餘八匹每匹原以馱一百二  
十一觔餘算後每朋增給騾子一匹故每匹以  
馱一百七觔算今寧夏所有三千兵丁亦照前  
每人一僕四人合為一朋其帳房鑼鍋搭連鑄  
斧鋤鋤等物俱照前帶去前帶口糧八十日今  
帶百日較前多二十日每朋之米增倉斛一石

六斗零重增一百六十觔今將馱子比前減輕  
則兵丁每人以馬五匹算一朋二十匹馬均馱  
每匹得九十四觔餘一口每月以倉斗二斗算  
則六千口所需百日之米共倉斛四千石其自  
大同赴寧夏之大臣官員及在寧夏之大臣官  
員本身親隨披甲僕從共一千三百五十五口  
一口每月以倉斗二斗算百日共需米九百三  
石二斗零自大同赴寧夏之兵二千在大同之

新滿洲護軍二百每人已撥給馬四匹伊等俱  
應增給馬一匹為五匹在寧夏之西安兵八百  
僅馬各三匹此兵八百俱應增給馬二匹亦使  
為五匹此增給之馬將學士朱都納寧夏所喂  
五千馬內撥給各拴帶百日之糧此枝兵隨糧  
百日共需倉斛五千石又肅州一路將軍博濟  
兵二千孫思克綠旗兵一千共三千除博濟兵  
二千撥給牲口已經會議應不議外孫思克綠

旗兵前經預備六千其馬六千每日以料八升  
喂四十日今但用一千綠旗兵則所拴帶百日  
之米應將前所喂綠旗兵之馬內令將軍孫思  
克酌量撥給此一路滿洲官兵僕從連綠旗兵  
共五千六百二十口其綠旗官兵僕從數目原  
未申報約畧以三百為率計之該共五千九百  
二十口應隨百日糧一口每月以倉斗二斗算  
需倉斛三千九百四十六石零此兩路應隨百

日之糧共八千九百四十六石零兩路隨糧俱  
用寧夏兵押運駱駝一頭以馱倉斛一石二斗  
算重一百八十觔所需駱駝七千四百五十六  
頭騾一頭以馱倉斛八斗算重一百二十觔所  
需騾一萬一千一百八十二頭馬一匹以馱倉  
斛六斗算重九十觔所需馬一萬四千九百十  
匹驢一頭以馱倉斛四斗算重六十觔所需驢  
二萬二千三百六十五頭此兩路百日隨糧馱

運牲口當取京城解往駱駝一千一百一十頭  
騾三千六百十七頭學士朱都納所喂五千馬  
內撥給兵丁餘剩之馬及于成龍等捐助不合  
例人員在寧夏捐助之三千餘牲口部員所買  
之牲口地方官捐助之牲口撥用馱米牽此項  
米馱者著撥綠旗兵一千于成龍王國昌喻成  
龍李鈔喀拜辛保范承烈等俱情願効勞運米  
則寧夏兩路隨運之米俱應交伊等運往

命下之日著于成龍等速往寧夏將押米綠旗兵丁口糧等物及派管理官員等事與該督撫會同料理又前者牛一頭算八十口羊一隻算十五口今所買牛羊隨其所得押送可也得

旨總督及甘肅巡撫內著一員來寧夏理事一員往肅州理事餘如所議

己未

撥官十員採買軍需駝馬等物大學士阿蘭泰等

與兵部會題曰臣等奉

旨撥官十員赴肅州寧夏等處採買駝馬騾驢牛羊  
有出而願往効力者乃內閣侍讀學士阿爾賽  
翰林院侍講學士朱臣御史蘇克濟常綬顧素  
宗人府郎中敖海工部郎中朱蘭泰戶部員外  
沙里布刑部員外王鴻烈理藩院員外喇都渾  
等十人又備選翰林院侍讀學士覺羅華顯光  
祿寺少卿常賽吏部郎中乖哈兵部郎中金圖



刑部郎中常武工部郎中滿都凱察里宗人府  
員外殷達禮刑部員外溫察等九人以綠頭牌  
列名具奏

上命願往効力之十人去於是集願往効力者侍讀學  
士阿爾賽等十人掣籤侍講學士朱臣御史常  
綬蘇克濟員外王鴻烈喇都渾掣得肅州侍讀  
學士阿爾賽御史顧素郎中教海朱蘭泰員外  
沙里布掣得寧夏

召將軍薩卜素回京養病領侍衛內大臣班第傳  
上諭曰著黑龍江將軍薩卜素回京養病以賢員一人  
為首領代彼管轄兵丁今日明日有便行文前去

癸亥

給大將軍費揚古官兵僕從口糧戶部奏曰大將  
軍費揚古咨稱奉

上諭云著於解往五千兩銀內給留駐一百名之兵比  
照察哈爾兩個月糧亦給為兩個月糧欽此欽遵

計留駐一百名兵自喀倫地方給過兩月糗糧  
滿日為始至今年正月初五日止採買兩個月  
糗糧已經給與今除前往喂馬之官兵僕從現  
在此地者共一百二十六口所需口糧八石四  
斗近奉

上諭云于成龍等解往一千五百石之米著節省支用  
或動支此米即給伊等或另作措置乞大部定  
奪施行查于成龍等解去之米奉

旨節用且為數不多應照大將軍所請將于成龍等  
解去米一千五百石內動支八石四斗給之

上許之

戊辰

副都統阿南達報哈密國擒逆賊噶爾丹之子  
色卜騰巴兒珠爾來獻阿南達奏曰哈密回子  
額貝都拉達爾漢白克聞噶爾丹之子色卜騰  
巴兒珠爾在巴爾思庫兒地方周行捕獸遣其

長子郭帕白克率兵擒色卜騰巴兒珠爾及其  
乳父揮特和碩齊等人解至臣軍中為此將色  
卜騰巴兒珠爾等送往

御前謹具奏

聞

上命示議政諸臣

己巳

使將軍孫思克設哨禦噶爾丹議政諸臣奏曰將

軍孫思克疏言哈密達爾漢白克額貝都拉報稱噶爾丹有至巴爾庫兒之狀我軍所喂馬若至二月二十則可得膳臣請於二月二十間進布隆吉爾等處探聽如噶爾丹來至哈密巴爾庫兒則遵

訓旨而行如仍在格格特哈郎古特等處則候

皇上神謨指示查噶爾丹今窮困已極二月二十日之前未必不至巴爾庫兒等處地方應著將軍孫

思克等遠設斥堠以探實音如噶爾丹至巴爾庫兒等處將軍孫思克等作速領兵立刻堵剿如兵丁馬匹稽遲則擇汎地官兵馬之肥者而行毋失機會噶爾丹尚未有來信則二十日間不必往布隆吉爾去候

旨而行可也

上從之

烏朱穆秦等處蒙古諸王奏請從軍効力

不許理藩院奏曰烏朱穆秦和碩車陳親王色登端  
多卜阿霸垓多羅郡王吳爾占噶喇卜多羅卓  
禮克圖郡王達馬林扎卜蒿齊忒多羅郡王雅  
木批兒阿霸哈納爾多羅貝勒布昭阿霸哈納  
爾固山貝子額林辰達什阿霸垓吳爾占噶喇  
卜王旗下固山貝子車林敦魯卜協理台吉巴  
魯巴巴格根羅卜親洪郭爾津他爾土巴扎卜  
噶爾臧巴特馬薩馬達阿霸垓多羅卓禮克圖



郡王達馬林扎卜旗下二等台吉賓等附併土  
默特多羅貝勒額駙厄爾德木圖旗下喀爾喀  
多羅貝勒羅卜臧喀爾喀部長鎮國公齊卜騰  
輔國公車陵達什等情願自備馬匹什物軍前  
効力為此轉奏

上曰伊等馬畜不足著各歸家不必從軍後有奏請者皆  
以此旨覆之勿受

庚午

勞賜大將軍費揚古

上諭費揚古曰駐扎肅州副都統阿南達疏言擒噶爾丹之子色卜騰巴兒珠爾於哈密之地正月十六日晚正在暢春苑西門放燈及煙火衆蒙古及厄魯特投誠男婦皆集其疏一到衆皆大悅爾防守窮壤不得在朕左右故抄阿南達報文發汝知之時當年節通國老少皆嬉戲行樂爾獨居寒塞無聊之地殊深軫念是以賜之胙肉鹿尾關東魚鮑

瓜等物且問爾無恙朕躬安即如與爾相見時爾  
無恙否噶爾丹作何料理不失機會朕與諸臣議  
定後另有旨特諭

辛未

都統蘇努等出征

諭以行兵之法都統蘇努巴渾代阿什坦齊什塞稜  
格等入請

訓旨

上諭曰凡我兵廝不齊起行退落在後造飯而食任意  
混行勞馬者甚多或有大臣官員亦久卧不起一  
二人留落在後者有之爾等當嚴督趲行其嚙雪  
之馬不可即飲水著曉諭深戒今方春時已有旨  
令拴繫齊臚著小心看視又大同兵前已給三個  
月錢糧今再令支三個月錢糧支此錢糧在大同  
右衛等處支取至食米亦在右衛殺虎口支取帶  
去勿動湖灘河朔之米其大同新滿洲護軍二百

仍令在大同照常喂馬候駕即將諭汝等之旨交與兵部速發諭馬思喀

壬申

安插厄魯特降人於張家口外

上諭內大臣曰前以在京厄魯特應與建房居住故命議政諸臣集議今厄魯特在此患病物故者甚多此屬既已輸誠歸化殊為可憫其將伊等令各該佐領幫助帳房行李送至張家口外牧場之地在

彼散處應給糧餉仍照常分給令伊等食其米積銀以買牲畜則可以謀生矣以後天時漸熱疾病死亡者庶幾亦少著議政諸臣集議尋奏臣等欽

惟

上諭極是應傳諭三旗令厄魯特所隸各該佐領捐助資裝送至張家口外交與各該旗游牧地方叅領監管所給糧米應動支張家口倉米每年兩季令住居游牧地方三旗均輾車輛駱駝差官

運往散給所給餉銀令戶部算數行文直隸巡撫動支張家口附近州縣正項錢糧給與此銀交兩季送米官帶去將銀與米一併眼同散給此項厄魯特既安插張家口外應停止建房

上可其奏

臣謹按招携懷遠帝王之大德故即獷狁難馴之輩一旦革面嚮風歸仁慕義尤必示以矜全之意加以軫恤之恩其或風土異宜疾

疾間作煦嫗覆育有痾瘕一體之誼焉我

皇上憫厄魯特之屬輸誠歸命豢養京師慮其寒燠之  
失時以至食飲之違性籠禽檻獸有投林集  
木之思爰

命所屬佐領予以廬幕贍以資糧移插張家口外仍  
優給廩餉俾得置牲畜以滋蕃息從此游牧  
得所食息晏如物無天札之虞人有更生之  
樂



皇仁如天不以荒徼絕域而二視之也

癸酉

左都御史于成龍等告請効力

許之時于成龍王國昌李鈔喻成龍辛保范承烈喀  
拜等以

上將三舉北征自寧夏進剿因復以隨行効力為請

上曰于成龍等七人既願隨駕効力准其前去著多備

牲口以行

甲戌

增給察哈爾官兵俸糧先是察哈爾八旗官兵原

無俸糧

上念其征行勞苦

諭理藩院戶部曰屢年以來察哈爾八旗官兵處處  
從軍効力甚苦伊等向無俸糧欲俟滅噶爾丹後  
於恩詔內增添俸糧但覺太遲自今察哈爾官員  
著比照京官俸量減給與目下護軍暫給二兩驍

騎暫給一兩自今以後護軍每月仍給二兩驍騎  
一兩爾等作速定議具奏即於二月支俸時給之  
尋尚書班第馬齊等議八旗察哈爾在邊外者  
其世襲官俸應照京官俸四分減三給之三等  
公一員應給一百六十五兩一等精奇尼哈番  
四員應各給一百二兩五錢二等精奇尼哈番  
一員應給九十六兩二錢三等精奇尼哈番二  
員應各給九十兩一等阿思哈尼哈番一員應

給七十七兩五錢二等阿思哈尼哈番三員應  
各給七十一兩二錢三等阿思哈尼哈番一員  
應給六十五兩一等阿達哈哈番兼一拖沙拉  
哈番一員應給五十八兩七錢一等阿達哈哈  
番三員應各給五十二兩五錢二等阿達哈哈  
番四員應各給四十六兩二錢三等阿達哈哈  
番二員應各給四十兩拜他拉布勒哈番十七  
員應各給二十七兩五錢拖沙拉哈番二十四

員應各給二十一兩二錢世襲官俸四分給一  
共計銀二千六百六十五兩零叅領等官九員  
佐領等官三十七員五品官十九員六品官八  
十一員應照京官俸減半給之共計銀五千六  
百九十兩零前鋒護軍一千八十五名每月一  
名給二兩驍騎及執事人員一千七百六十名  
每月一名給一兩一年應給兵餉共計四萬七  
千一百兩零以上官員兵丁一年所需共計銀

五萬五千五百兩零此官員內有現食俸者仍照常給與現任官員內有世襲者當照減等之數量給年幼官員兵丁尚未當差宜俾其給與所給官兵俸糧俟行役既罷生養充足之日再行奏止

從之

丙子

使都御史于成龍仍管運米事先是奉有著于成

龍等與吏部尚書庫勒納監押駝騾前赴寧夏  
之

旨于成龍等入請

訓旨

上問曰爾等既云情願効力今仍告請運糧否乎于成  
龍等曰

皇上前付臣等以運米重任奈臣等疎庸致悞軍機現  
在議處尚且不勝悚懼何敢復行告請如蒙

聖恩收其後効補其前愆臣等敢不竭盡心力以饋輸  
是任

上云于成龍等七人可復為朕督運爾等臆瘦之馬許  
於八旗官馬內各易肥健者二十匹帶去其効勞  
官員或五匹或十匹亦准更換帶去

己卯

定出師日期先是

上諭兵部曰朕欲幸右衛駐蹕近則易於調遣出師日



期著於二月朔以後選擇欽天監先擬二月初十日改擬二月初四日至是

諭另擇期隨擬二月初六日丁亥辰時利破賊行師從之

庚辰

以必牙思呼郎等為主事帥兒等為筆帖式使之從軍理藩院奏曰臣部原任郎中今任三等侍衛正藍旗必牙思呼郎原任員外今任佐領鑲

紅旗三布代正黃旗祈他特原任員外今任護軍校鑲藍旗薩哈連等告請隨

駕効力伊等俱在臣部年久諳練之人請將伊等俱授為主事此次帶去用其力俟缺出開除原任員外正藍旗蒙古帥兒鑲藍旗蒙古傅昌伊等告稱此次我等願隨

駕効力伊等在臣部年久俱請授為無品筆帖式帶往用其力可也

上從之

癸巳

大將軍費揚古奏報諸部長及從征官捐助馬駝之數費揚古奏言去春大兵進剿之時奉

旨令諸部長捐助馬匹計捐助者西勒圖庫圖克圖馬二十九匹陀音庫圖克圖馬八匹擦雅班達達庫圖克圖駱駝五頭馬三匹住持大喇嘛阿齊圖綽爾濟馬二十匹住持喇嘛勞占尼瑪馬

七匹住持喇嘛彭蘇克馬十一匹住持喇嘛恩  
木齊馬十九匹住持喇嘛克卜松馬四匹喇嘛  
代哈丹津馬二匹喇嘛達賴綽爾濟馬二匹又  
去春大兵出塞馱負大砲及火藥鉛子繩索等  
物急需駱駝其捐助者計吳喇忒公都稜駝五  
頭吳喇忒公鄂爾奔五頭吳喇忒公達爾馬什  
里五頭毛明安部長台吉諾爾布五頭喀爾喀  
和碩親王善巴十頭親王善巴旗下額爾德尼

班達達庫圖克圖五十頭多羅郡王滾布十頭  
多羅郡王默爾根濟農顧魯什希十頭默爾根  
濟農顧魯什希旗下達爾漢喇嘛五十頭公汪  
舒克四頭公烏巴達四頭部長台吉額兒濟亨  
哈坦巴圖爾滾占三頭部長台吉丹津額爾德  
尼三頭部長台吉吳爾占三頭部長台吉汪舒  
克三頭部長台吉圖巴三頭衛徵帶青台吉凱  
木楚克二頭多羅郡王彭蘇克阿拉卜灘二頭

察罕巴爾貝子寶貝二頭部長台吉額爾德尼  
滾布二頭貝勒薩漫多爾濟四頭又喀爾喀和  
碩親王善巴以兵丁馬匹缺少復捐馬四十匹  
此項捐助馬駝載礮火藥鉛彈繩索等物又給  
駕舟新滿洲侍衛護軍校護軍五品官厄魯特  
鄂欣等無馬駝者後又正卿辛保等運米而來  
令侍讀學士布泰郎中桑格遍諭衆部落有駱  
駝者暫行捐助運完之日仍各給還原主為此


喀爾喀達爾漢親王諾內助十頭吳喇忒公鄂  
爾奔旗下協理台吉吳爾圖納蘇圖二頭吳喇  
忒公達爾馬什里旗下協理台吉拔額爾二頭  
鄂爾多斯公杜稜三頭四子部落多羅郡王三  
濟扎卜旗下協理台吉龐三頭毛明安部長台  
吉諾爾布二頭土默特都統阿爾納副都統阿  
迪二頭土默特阿必達旗下副都統阿玉什多  
爾濟二頭喀爾喀和碩親王善巴十頭公吳巴

達一頭公蘇泰伊爾登二頭部落台吉丹津額  
爾德尼一頭揚威將軍覺羅舒恕一頭振武將  
軍孫思克一頭西安將軍博濟一頭都統公彭  
春一頭都統伊勒慎一頭護軍統領宗室費揚  
固一頭副都統碩太一頭侍郎滿丕二頭副都  
統黨愛一頭拜布一頭戈爾對一頭侍讀學士  
布泰一頭郎中桑格一頭用此項捐助駱駝運  
米訖為此奏



聞

上報聞



聖祖仁皇帝親征平定朔漠方略卷三十五